



Ti Koxsinèl

Na inn fwa pou inn bone fwa, dann fon la Ravine, navé inn ti karo d'flèr, tout' koulèr. Dann karo d'flèr-la, in takon ti bébèt navé zot kaz, épisa anparmi, navé inn té i rès ansanm son monmon.

Ti bébèt-la té i apèl Ti koxsinèl !

Ti koxsinèl, in Karapas' si l'do, épisa dé zèl rouz, parèy flanbwayan lavé may ann-dan !

Ti koxsinèl té inn ti bébèt fité, Konm i di, épisa èl té i yinm bonpé lamizman : vol dann flèr, fé glis' sonn ti pat' dann lo la ravine, zwé kadok ansanm grin la pousyèr, karès' fèy pyédbwa, fèy fatak, fé shof solèy, fé zigzag ansanm gro gout' la pli, kiswa bo tan, mové tan, an longèr d'zourné, ti koxsinèl té i lès' aèl viv.

Solmansa, navé riyenk in sèl zafèr son momon lavé di aèl :

« pangar gro gout' la pli lèrk solèy i pèt'. Solèy va shof do lo épisa riskab lo bann gout' va bril out' do. Karapas' koxsinèl, sa la pa karapas' torti ! ».

Toulézour té i pas', toulézour gro solèy, sinonsa gro grin la pli, zamé la pli ansanm solèy. Solmansa, alapa kin zour, lèrk ti koxsinèl té pou zwé minm tan la pli té i farine, solèy la pèrs' niyaz, la fé shof farine do lo.

Ti koxsinèl té fine oubliyé lo bann kozman son momon té i mank pa in zour di aèl !

La pli la shofé, karapas' ? Griyé !

Parèy in lasid, la pli la bril lo do ti koksine. Larm la koul dann zyé lo pov' ti bèt'.

Mazine azot in koksine an gro pléré. Navé pwin pèrone, sinonsa son momon té i antann aèl ! Lo ti zanfàn la pas' la mizèr. Boubou té i dégiz son do, kolok kolok, do lo an pondyak té i pokpok si son n'ti kor.

Inn nuit', dé trwa zour aprè son gro pléré, ti Koksine la kit' la kaz son momon, pou aspèr trouv in pé lèr fré, soulaz in pé son bann boubou.

La Line té ronn dann syèl, ronn parèy in kèr koko. Limyèr la Line té sitantèlman for, Ti koksine la kashyèt aèl sou inn fèy sonz. In Fèy an kèr.

In gout' do lo la nuit la glisé, la limyèr la Line andan, la goutigout' si la karapas' ti koksine, la digdig aèl.

Ti koksine la gingn inn ti kou d'fré, èl la artourn la kaz son momon.

Land'min matin kan èl la rouv' son zyé, son bann' boubou navé pi. Bann ti zigzig nwar lavé pran la plas' bann klok' do lo.

Astèr i rakont dopi dann tan-la, ti Koksine néné ti zigzig si son bann zèl. Pousaminm, domoun i apèl aèl Torti bondyé, akòz sé Bondyèz la Line la nyabo son-y son bann boubou.